

LASÕMI LAULUL UMA PIDO TULD HOITA'!

Tõõsõlõ Umalõ Pido kor'atas väke luuduslidsõn pühäpaigan, Taivaskuan. Pido nakatuspääväl 28. lehekuu pääväl pandas sääl palama pidotuli ni hoiõtas tuud rahvalaulu ja -perimüse seen. Pia üüpäiv kestvält sündmüsel liigus tuli pidopääväl, 29. lehekuu pääväl edesi pidoplatsi pääle Indsikurmu. Tuu mõnusas kõrraldamisõs oodõtas hüvvi abiliisi – lauljit, pillimihi, jutukõnõlõjit! Loe' edesi, ku hää olõt ja avita' tahat!

LASÕMI PIDOL HUUGU KOR'ADA'

Vägeväs pidos om vaia väke kor'ada! Tuuperäst omgi inne Uma Pido pidopäivä "pido nakatuspäiv" 28. lehekuu pääväl, ku pito esi'sugutsidõ ettevõtmiisiga alostama naatas ja nii pidos huugu võetas ni hinnäst tuus valmis pandas.

Uma Pido om sündünü', et panda' esi' tähele ja näüdädä' tõisilõ Vanna Võromaad, tuu katsat esi'muudu kihlkunda, tuvva' vällä lõunõestilist ilmakaemist, seo kandi kiilt, laulõ ja perimüst.

Tuu jaos, et anda' Umalõ Pido, kihlkundlidsõlõ vaimulõ, ummi juuri ja perimüse tunnõtamisõlõ mõnusat joutu, sünnüs pidotuli Taivaskuan. Taa om Põlva kihlkunna ja terve tuu nuka kõgõ vägevämb luuduslinõ pühäpaik. Taivaskoda om kotus, kon luuduslinõ ja vaimlinõ perändüs ni pall'odõ põlvi hää' soovi' omma' saanu' aastagatuhandidõ jooksul ütes.

Kiä Taivaskua kotsilõ inämb teedä' saia' taht, lugõgu' tuu kotsilõ artiklit aadrõsi päält http://www.maavald.ee/failid/LS_04_Taevaskoja.pdf

Suurõn Taivaskuan 28. lehekuu päävä õdagu, ku päiv lätt mõtsa taadõ, sis kellä 20.00. ümbre vai veidü' ildampa, lauldas päävaveerütämise lauluga päiv magama ja tuli üles.

LASÕMI LAULUL TULD HOITA'

Palama pantut tuld hoiõtas Taivaskuan pidopäivä, 29. mai päältlõunõni. Päält tuud naatas Põlva poolõ tulõma. Uma Pido rongkäügi alostusõs joud tuli Põlva järve viirde, et sis üten pidoliisiga Indsikurmu pidoplatsi pääle edesi liiku'.

Tuld lastas hoita' laulul ja taakandi perimüsel. Tuujaos om appi vaia inemiisi, kiä laulul, rahvamuusikal ja -jutõl tulla' lasknu'. Vana Võromaa katsa kihlkunna, a ka muiõ Eesti nukkõ rahvalaulu', -jutu' ja -muusiga omma' märgidü' tulõlõ joutu andma pia üüpäiv läbi. Säält edesi kah, pido rongikügin ja pidoplatsil, hoitva' tuld mii' edevanõmbidõ kiil ja miil.

TULÕHOITJIDÕ KIRJÄPANDMINÕ

Et laul, jutu' ja muusiga Taivaskuan katski es jäänü', uutva' kõrraldaja' abiliisi kõigist Vana Võromaa ja ka muu Eesti kihlkunnõst. **Kirjä pandas nii tulõhoitjidõ puntõ ku ütsikit abiliisi. Pallõmi hindäst märko anda' Tiit Kaasikulõ (tel 53047288, e-post ttkaasik@smail.ee)** ja teedä' anda':

- uma nimi vai pundi nimi ja pundinolõjidõ arv ja kontakti'
- määntse kihlkunna laulõ, muusiga ja perimüsega ni ku pikä ao seen tuld hoita' joudas

Kõrraldaja' pandva' kõik abilisõ'-pundi' kirjjä, tegevä' aokava ja andva' tuust kõigilõ osaliisilõ teedä'. Tuuga taheta-ai tagasi hoita' vapa päälennakkamist, a proomitas asja nii kõrralda', et tulõhoitja'-laulja' är' es väsinü'.

KÕRRALDUSJUTTU KAH

Mi olõ Taivaskuan nii, et tuu kotusõ pühähüst saanu' edespiten tunda' ka tulõvadsõ' põlvõ'. Mi tii tuld õnnõ kotusõ pääl, kon tuu jaos luba om ant. Mi õiõnda umma hätä õnnõ kotusõ pääl, miä om tuu jaos ette nätt. Mi jätä-ai hindäst maaha prahti. Mi võta-ai üten alkoholli. Hoiami uma' meele' ja mõttõ' puhta'. Ku võimalik, tulnu' inne Taivaskotta tulõmist uma iho sannan puhtas mõskõ'. **Mi piä hinnäst ülevän vastutustundõga ja tunnõmi hinnäst sis mõnusahe.**

Kõrraldaja' hoolitsõsõ' tulõ ja hääkõrra iist, niisama tulõhoitjidõ väiku kõtutäüte iist, kõrraldasõ' vihma aos hädäperälidse kaitsõ ja muidoki tulõ viimise Taivaskuast Põlvahe.

Sündmüst kõrraldasõ' üten Uma Pido toimkunnaga Maavalla Koda, Emujärve Koda, SA Hiite Maja, MTÜ Mõnusam Elu, MTÜ Hinokad ja Haanimiikki Nõvvokoda.

KÕKKÕ TIIDVÄ' JA EDESI KÕNÕLÕSÕ':

Tiit Kaasik
MTÜ Mõnusam Elu
Tel 53047288
E-post ttkaasik@smail.ee

Epp Margna
MTÜ Hinokad
Tel 5144718
E-post hinokad@metsas.ee

Uma Pido kodoleht
www.umapido.ee